



PORTAVÓS VI GOVERN U KONSTITUSIONÁL



KOMUNIKADU BA MEDIA

Díli, Loron 27 fulan-outubru tinan 2016

Governu hatuur Timor-Leste hanesan fatin turístiku úniku no akolledór no lansa Portál foun Turizmu nian

Governu hatuur Timor-Leste hanesan fatin turístiku úniku no akolledór no lansu Portál foun Turizmu nian Iha loron 26 fulan-outubru kalan, Governu ofisialmente lansu ona Portál foun Turizmu nian, iha <http://www.timorleste.tl>.

Portál ne'e hanesan pájina dijital ida ne'ebé hakarak halibur informasaun fiar-bele (kredível) sira no atualizada kona-ba buat hotu ne'ebé Timor-Leste iha atuofere se hanesan fatin turístiku úniku no akolledór. Ministru Turizmu, Artes no Kultura, Francisco Kalbuady Lay, hateten katak portál ida ne'ebé iha kualidade aas sei foti aas perfil Timor-Leste nian iha nivel internasionál, hodi hamosu interese no tulun ema hodi konverte ninia "vizaun iha vizita ida" no halo planu kona-ba nia viajen.

Portál ne'e hanesan kolaborasaun ida entre Ministériu Turizmu, Artes no Kultura no Asia Foundation. Faze desenvolvimento portál ne'e nian han tempu fulan neen no inklui prosesu rigorozu ida kona-ba halibur informasaun nian, sesaun fotografia nian sira iha nivel nasional no konsulta barak ho parte sira ne'ebé iha interese iha setór Turizmu no parseiru desenvolvimento nian sira. Portál ne'e sei hetan atualizasaun nafatun no fó biban ba ema sira atubele hato'o sujestaun, fó informasaun no hato'o kestaun ruma. Projetu ida ne'e hetan finasiamentu husi Ministériu Turizmu, Artes no Kultura, Asia Foundation, Organizasaun Internasionál Traballu, Embaixada Austrália no Embaixada Nova Zelândia.

Kriasaun portál ne'e nian hanesan etapa ida de'it husi kampaña marketing internasionál ne'ebé maka Governu prepara hela, ho apoiu husi parseiru sira, no sai hanesan ninia merkadu alvu mak Austrália, Indonézia no Portugal, no seluk-seluk tan. Konseitu ida ne'ebé ho marka, logótipu ida no slogan ida sei apresenta ba-iaha Konsellu Ministrus iha tempu badak nia laran atubele hetan apresiasaun.

Aprezentasaun ne'e halo hafoin enserramentu Konferénsia Internasionál kona-ba Turizmu ne'ebé hala'o semana ne'e iha Díli, iha ne'ebé Ministru Estadu, Koordinadór Asuntu Ekonómiku no Ministru Agrikultura no Peskas, Estanislau da Silva, hateten katak Turizmu "importante tebes ba futuro ekonomia Timor-Leste nian no ba kualidade moris nian ne'ebé ita hakarak garante ba sidadaun hotu-hotu iha país ne'e no husik hela ba jersaun sira aban bainrua nian.

Portavós Governu nian, Ministru Estadu Agio Pereira, felisita ema hotu ne'ebé envolve iha desenvolvimento portál nian no dehan: "Turizmu hanesan ai-riin ida husi ai-riin lima ba ita-nia desenvolvimento ekonómiku. Ita tenke halo mundu koñese saida mak ita iha atu ofere se no ita pruntu atu rekompensa sira ne'ebé mak mai,



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl

hodi simu sira ho di'ak no ho servisu ne'ebé iha kualidade, atu nune'e sira labele haluha sira-nia esperiênsia ne'e". **REMATA**

